

## **Saa'mi ouddoumaž Veikko Feodoroff saakkvuárr teáđtempooddâst Sä'mmlai tuóttvuótt- da suávâdvuóttkomissio piijjmõžžâst**

Riikksuávtõs lij piijjâm Sä'mmlai tuóttvuótt- da suávâdvuóttkomissio tä'bbe riikksuávtõžž sáabbrest. Mä'tkk lij leämmaž ku'kes tän sájja, ko'st áá'n leá'p. Sää'm-meer lij sagstõöllâm tuóttvuótt- da suávâdvuóttprosee'ss valmštõöllmõžžâst ju'n mánngg ee'jj.

Nuórttsaa'mi ä'rbbvuóđlaž vaaldsemriâšldõõgg Saa'mi siidsáábbar áá'lmõs mie'reemvää'ld õõ'nni siidsáábbriin mainstim vuõss vuára ää'sšest koumm ee'jj máâiárra. Tá'l oummu õ'nne tää'rkes ä'sšen tõn, što nuórttsää'm vuážžče va'lljeed puó'tti komissioo'je jii'jjes komissaar. Seämma ee'jj sä'mmlaid já'rjsteš kuullâmpooddid, kooi vuáđald rajjum rapoortâst puó'di čiõlggsânji õu'dde sä'mmlai õhttsažkáá'dd pannáskk prosee'ss vuásta.

Teimma raaukim sää'm-meerast Saa'mi siidsáábbra e'tkkõžžid Sä'mmlai tuóttvuótt- da suávâdvuóttkomissio vuázzi'žžen. Mie'reem e'tkkee komissaarân vaaldsemiõ'di maister Irja Jefremooff, káá'tt lij sää'm-meer veiddsõs na'ddjõžž naudšeei ooumaž. Saa'mi siidsáábbra puáttam e'tkkõžžin sää'm-meer uu'di veiddsânji peá'lestválddmõžžid suu va'lljummšest komissio vuázzi'žžen.

Leá'p sagstõöllâm komissio mandaattâst da valmštõöllâm komissio piijjmõžž Sää'mtii'ggin da Lää'ddjânnam riikkin. Öhttân tää'rkmõs kõõččmõššân lij leämmaž psykososiaal'laž tuárjjõžž já'rjstumuš komissio tuáj äi'ggin. Haa'leep pu'htted õu'dde huõl nuórttsää'mkiõllsaž psykososiaal'laž tuárjjõžž kääzzkõžžid vuážžamvuóđâst. Nuórttsää'mkiõllsaž kääzzkõžžid jie leäkku komissio tuáj aalgâst ni voo'ps. Tuóttvuótt- da suávâdvuóttkomissio kiõtt'tâall da kágg õu'dde tuájstes vai'gges da lõ'sses aa'sšid. Lij tää'rkes staaneed psykososiaal'laž tuárjjõžžid vuážžamvuóđ komissio tuáj mánŋa še, ko tuárjjõžžid tarbb puátt šõddâd prosee'ss ääi'j.

Haa'lääm spä'ssõõššâd Saa'mi siidsáábbar peá'lest Sää'mtee'ggin da Lää'ddjânnam riikk ee'tkkee'jid sagstõöllmõžžid da õõutveäkká tuejjuum valmštõöllâm tuájast. Komissio tuáj älgg tá'st da tuáivtam komissaarid viõggid da lekkvuóđ tän tää'rkes di seämma ääi'j še lõ'sses tuõjju. Nuórttsaa'min lij nâänn áskk komissio tuáj o'nnstummša.